

四庫全書

集部

欽定四庫全書

石倉歷代詩選卷二百九十三

明 曹學佺 編

明詩初集十三

高啓

江上看花

兩年京師不見花
青衫白馬驅塵沙
今年江邊偶無事
狂醉爛漫尋春華
游蜂飛蝶日妍暖
紅紫正發紛交加

穿蹊每入隣媼圃叩門或到山僧家漸老都無少年樂
底用簫鼓隨行車攀條繞樹對吟詠不忍歸去至日斜
花應得我相慰賞似笑欲舞爭矜誇我如無花亦寂寞
閉戶有酒誰能賒夜來茅屋卧雲雨曉起走看成咨嗟
飄英墜萼不可綴餘艷只侶銷殘霞明知春色不久住
豈料便去難留遮野鶯啼罷一回首恨與芳草盈天涯

謝陳山人贈其故弟長司所畫山水

大髯袖中有廬霍嵐氣噴人寒色薄出贈生絹一幅圖

云是小髯之所作我嘗游君伯仲間仲今已沒空見山
畫中無限礪礪意使我坐看愁滿顏重巖複澗迷樵路
煙蘿冥冥晝如暮溪閣風生醉客眠野橋月出歸僧度
櫪林蒙密楓林高深處似有猩猩號滿空雲凍動秋思
飛泉落日何蕭騷揮毫若此難再得白鶴何時返鄉國
良工自古多苦心留賞人間賴遺墨南宮北苑皆已仙
此圖與之當並傳坐嗟存沒意難報作歌愧匪瓊瑤篇

題武昌魏槃所藏畫

楚山遠吐參差碧
虛閣開臨繫船石
沙樹凋時鄂渚秋
江鷗沒處湘潭夕
閣中幽人坐讀書
書聲入水驚龍魚
欲吹短笛相尋去
黃鶴磯頭好待予

題韓長司所畫山水圖

參卿昔在西安幕
騎馬看山時出郭
終南泰華勢最高
橫作秋雲掃寥廓
秦川漢苑萬里開
酒醒望遠登荒臺
日斜渭上歸人渡
岳暗關中飛雨來
此處奇觀絕天下
何事歸來又看畫
畫中小景似江南
黃葉漁村見煙舍

莫戀江南真故鄉
蓴鱸炊熟酒船香
美人不是滄洲客
去去宜登白玉堂

夜發錢清

錢清渡頭船夜開
黃茅苦竹聞猿哀
客官醺酒水神廟
風雨滿江船正來
蒸飯炊魚坐篷底
不覺舟行兩山裏
棹歌早過越王城
東方未白啼鴉起

獨遊雲巖寄周砥

城西諸山非不奇
我游獨與諸山宜
紅櫻春開山後寺

白水夏滿山前陂幽居況與山不遠鐘鼓每到空齋帷
雨餘煙中落日下曳杖往讀頭陀碑兩巖蒼蒼石色古
枇杷樹高陰滿地殿燈欲昏上羣鼠塔鈴已靜蹲孤鷗
興來即游興盡返迎送豈要山僧知困窮喪亂豈無感
正賴此境忘吾悲嗟君何為乃自苦破羈短策塵中馳
挂帆能來亦非晚浦口三日南風吹

練圻老人農隱

我生不願六國印但願耕種二頃田田中讀書慕堯舜

留待四海昇平年却愁為農亦良苦近歲征役相煩煎
養蠶惟堪了官稅賣犢未足輸丁錢虬髯縣吏叩門戶
鄰犬夜吠頻驚眠雨中投泥東鑿塹冰上渡水西防邊
幾家逃亡閉白屋荒村古木空寒煙君獨胡為有此樂
無乃地邇秦溪仙門前流水野橋斷不過車馬惟通船
秧風初涼近芒種戴勝曉鳴桑樹顛短衣行隴自課作
兒子饁後妻耘前白頭雖復勞四體若比我輩寧非賢
旅游三十不稱意年登未具粥與饘便投筆硯把耒耜

從子共賦幽風篇

膏蒲桃酒歌

西域幾年歸使隔漢宮遺種秋蕭瑟誰將馬乳壓瑤漿
遠餉江南渴吟客亦霞流髓濃無聲初疑豹血淋銀甕
吳都不數黃柑釀隋殿虛傳玉薤名聞道輪臺千里雪
獵騎弓絃凍皆折試唱羌歌勸一觴羶房夜半天迴熱
絕味今朝喜得嘗猶含風露萬珠香牀頭如能有五斗
不將輕博涼州守

牀屏山水圖歌

畫師知余愛青山久墮塵網無由還故將列岫寫屏障
使我卧起于其間從此長如宿清境枕上分明見峰嶺
爐煙曉入帳中飛擁被驚和白雲冷丹巖碧樹層層開
江雨遠逐孤帆來就中樓閣是何處彷彿神女巫陽臺
楚山修竹瀟湘水似有清猿忽啼起江南千里夢游歸
半牀落月高堂裏

方隱君山園

吳興城南山水勝竹樹參差萬家映幽深誰似隱君園
車馬不來雞犬靜兩溪迴通柳巷曲一峰立對柴門正
東西別墅怜更好孤棹往來隨晚興總令種菜不種桃
新製長鑱木為柄家童頗解候天時鄰叟還能論地性
交交林路翳復開活活野泉流不定清晨聞鳥欣獨往
濃綠潑晴畦色淨老葉垂根孤蚓號殘英綴梗羣蜂競
乍繁新蔓喜籬長欲迸晚牙嫌土硬此時採擷自足飽
肯為食肝煩縣令古來名園悉可數金谷辟疆誇獨盛

鑿石圓開弄月池
買花深作行春徑
愛妾宵陪秉燭宴
狎朋晝接流觴詠
長年歡樂豈知極
迴首芳菲屬他姓
只今誰解問遺蹤
斷甃摧垣無一剩
乃知厚業要德守
那得衰榮但言命
君能勤儉遺子孫
應有佳名書郡乘

明皇秉燭夜游圖

華萼樓頭日初墮
紫衣催上宮門鎖
大家今夕宴西園
高藝銀盤百枝火
海棠欲睡不得成
紅妝照見殊分明
滿庭紫燄作春霧
不知有月空中行
新譜霓裳試初按

內使頻呼燒燭換知更宮女報銅籤歌舞休催夜方半
共言醉飲終此宵明日且免羣臣朝只憂風露漸欲冷
妃子衣薄愁成嬌琵琶羯鼓相追續白日君心歡不足
此時何暇化光明去照逃亡小家屋姑蘇臺上長夜歌
江都宮裏飛螢多一般行樂未知極烽火忽至將如何
可憐蜀道歸來客南內淒涼頭盡白孤燈不照返魂人
梧桐夜雨秋蕭瑟

黑河秋風引賦趙王孫家琵琶蓋其名也

冰天夜裂天垂泣雲壓鷹低翻翅濕髯王醉影抱寒驚
羶殿嘈嘈箭鳴急紅冰淚落衰燈下倒卷河流入絃瀉
瘦駝卧磧歇鈴車朴朔陰沙鬼行野漢魂私語鬢風淒
都護營荒咽凍輦蘭山木葉連愁起散入寒門三萬里
夢斷金蟾隔煙小青冢埋聲秋不曉

泉州陳氏婦夫泛海溺死守志

妾家溫陵近南浦嫁得良人業為賈良人年長愛遠游
不敢新妝映門戶販寶遙聞去百蠻朝朝海上望青山

不仁無那蛟龍橫漂沒孤舟那得還君非渡河老狂父
波濤如山何不顧尋屍便欲赴窮淵膝下嬌兒誰與哺
十載空閨守寸心滄溟水淺恨情深願身不化山頭石
化作孤飛精衛禽

江上晚過鄰塢看花因憶南園舊游

去年看花在城郭今年看花向村落
花開依舊自芳菲
客思居然成寂寞
亂後城南花已空
廢園門鎖鳥聲中
翻憐此地春風在
映水穿籬發幾叢
年時游伴俱何處

祇有閒蜂隨繞樹欲慰春愁無酒家殘香細雨空歸去

香水溪

粉痕凝水春溶溶暖香流水銅溝宮月明曾照美人浴
影與桃花相間紅玉肌羞露誰能見只有鴛鴦窺半面
絳綃圍掩怯新涼歸卧芙蓉池上殿空洗鉛妝不洗妖
坐傾人國幾良宵驪山更有湯泉在千古愁魂一種銷

贈丘老師

長春之孫自仙骨袖有蟠桃食遺核平生不學燒汞方

唾視黃金等何物滿城誰識舊庚桑白髮人中似鶴長
時上高樓惟獨醉榴皮書破壁塵香

題朱氏梅雪軒

石城山居梅萬塢冒雪曾來扣僧戶爛然如見曾羣妃
白鳳繽紛下瑤圃數片輕吹著鬢華乍看是雪又疑花
迷魂亂眼春如海那辨南枝映竹斜獨披鶴氅穿林去
棟壓寒梢應幾樹聽響方知夜酒時聞香始識繁開處
回首春風憶舊游夢尋歸路隔羅浮年來驢背無詩思

醉踏塵埃空自愁

石崇墓

蚪須欲怒珊瑚折步障圍春錦雲熱真珠換妾勝驚鴻
笑踏香塵如踏空酒闌金谷鶯花醉家逐樓前舞裙墜
財多買得東市愁羅綺散盡餘荒丘猶憐白首同歸者
坐伴游魂楓樹下

太湖石

沒人采石山根淵投身不試饑蛟涎馮夷不解護潛寶

幾片捧出如青蓮寒姿本是湖水骨波濤激擊應千年
初疑鬼怪離洞府珊瑚鐵網相鈎連嵌空突兀多異態
雲吐夏浦芝生田龍鱗含雨晚猶潤豹質隱霧朝常鮮
清音叩罷磬韻遠微靨洗出珠窩圓坐移各岫置庭砌
日照彷彿生紫煙三峰削成泰華掌一穴透入仇池天
醉中時倒倚蒼蘚秋風冷逼吟詩肩洛陽園墅汴宮苑
當時駢列誇奇妍黃羅封蓋素氍褕裏萬里貢餉勞車船
奢游事歇家園廢盡仆荊棘荒池邊人生嗜此亦可笑

有身豈得如石堅百年零落竟誰在空品甲乙煩題鐫
又嗟此石何獻巧自召鑿取虧天全不如頑礪世所棄
滿山長作牛羊眠

客舍雨中聽江卿吹簫

客中久不聞絲竹此夕逢君吹紫玉斷猿哀鴈總驚啼
我亦無端淚相續數聲嫋嫋復鳴鳴散入寒雲細欲無
愁望洞庭空落木夢游秦苑總荒蕪曲中只訴君心苦
不道人聽更悽楚關山燈下歎羈臣江浦舟中泣嫠婦

憶昨閭門費酒貲
玉人邀坐弄參差
彩霞深院花開處
明月高樓鶴去時
如今忽在他鄉外
風雨寒窗兩憔悴
恨無百斛金陵春
同上鳳凰臺上醉
始知嶰谷枯篁枝
中有人間無限悲
願君袖歸挂高壁
莫更相逢容易吹

贈金華隱者

我聞名山洞府三十六
一一靈蹤紀真籙
金華秀出向東南
遠勝陽明與勾曲
樓臺縹緲開煙霞
天帝賜與神仙家
靈源有路不可入
但見幾片流出雲中花
子房之

師赤松子三十年前亦居此飛來恍惚誰解尋謾說至
今猶不死松花酒熟何處游瑤草自綠春巖幽羣羊卧
地散如石老鹿耕田馴似牛聞有隱君子乃是學仙者
自從入山中不會到山下世人莫知其姓名以山呼之
不敢輕樵夫忽見苦未識只疑便是黃初平嗟我胡為
在塵網遠望高峰若天壤扶苓夜煮倘許餐鍊杖來敲
石門響

春初來

春初來柳條欲舒花未開曉日窗前鳥聲喜似報春來
喚人起東風吹暖入煙痕綠遍江南幾千里去年春去
意愁人條忽今年又見春但欲逢春醉盃酒不管相思
成白首

烏夜村

荒村烏夜棲忽繞月明啼生得東家女身為萬乘妻至
今種高樹不遣烏飛去居人凡幾家愛聽啼啞啼啞
啞勿驚怪婦開門向烏拜

次韻過建平縣

縣雖三戶小地僻罷兵防茶市逢山客楓祠祭石郎雲
埋鳴澗斧沙壓度溪航應愛青山好經過駐客裝

雨篷

楚雨滿汀洲瀟瀟灑灑客舟夢驚孤枕夜愁掩一篷秋葦
葉寒相戰灘聲暗共流此時湘浦上同聽只沙鷗

梧桐

井邊雙玉樹高結自生涼影散秋雲薄聲喧夜雨長疎

英飄碧簟亂葉響銀牀綠綺誰能斲持將奏鳳凰

圍棋

偶與消閒客圍棋向竹林
聲敲驚鶴夢局罷轉桐陰
坐對忘言久相攻運意深
此間元有樂何用橘中尋

簟

蠻藤巧織成乍展覺涼生
紋感寒波細光搖夜月明
坐令葵扇棄眠與石牀平
須信南軒下炎天夢亦清

流螢

熠熠復青熒流光不自停暗飛如避月遠墮欲隨星穿
樹臨幽檻緣莎集小庭莫將羅扇撲囊取照遺經

錢塘送馬使君之吳中

樟亭離席散遙發畫幘車飛雉新阡麥啼鴛故苑花望
山登郡閣行水到田家莫道凝香句前人獨可誇

和周山人見寄寒夜客懷之作

亂世難為客流年易作翁百憂尋歲暮孤夢怯囊空門
掩雲峰裏燈明雪竹中無因乘夜訪相慰一尊同

城西客舍送周著作砥

客中寒食後惆悵送君違花隱歸城旆風吹渡水衣夜
窗炊黍散春苑鬪茶稀誰念西齋雨相思獨掩扉

西清對雨

楚臺雲起迴漢苑雨來微曉濕宮城旆寒沾陛楯衣溝
中隨葉墮爐畔帶烟飛坐詠西清暇君王召對稀

送張司勳赴寶慶同知

乍出司勳幙還乘別駕車按圖猶漢地輸布盡蠻家山

熟蛇懸樹江晴鶴浴沙
郡樓回首處北斗近京華

寓天界寺

雨過帝城頭香凝佛界幽
果園春乳雀花殿午鳴鳩
萬履隨鐘集千燈入鏡流
禪居容旅跡不覺久淹留

送前進士夏尚之歸宜春

淒涼庾開府老去復何如
故國歸鴻少新潮振鷺多
荆荒應自歎麥秀竟誰歌
相送堪愁思蕭蕭楚水波

送鮑翰林遷官陝右

鑾坡初罷直西去惜離羣載筆唐供奉褰帷漢使君濁
流河驛雨高樹嶽祠雲公暇應懷古登臨賦夕曛

送前國王助教歸臨川

去國獨依依羈臣淚濕衣夢中燕月冷望裏楚山微世
變人驚老身全詔許歸舟前楓葉落應到故園扉

送潘巡簡之閩中

京師到閩海秋色幾程餘莎柵山兵守榕林島戶居曉
衙雞應鼓晚邏騎隨車清世無他警將軍好讀書

送朱從事之吳興

釋褐方從宦青山故郡鄰
草深湖帶雨花暗驛藏春鼓
聚祈蠶女舟逢射鵰人
幙中應久待徒此惜離辰

京師寓廨呈知己

誰言舊隱非獨處靜相依
綠樹城通苑青山寺對扉
官閒休直早客久夢還稀
是物春來典惟存舊賜衣

贈張省郎

漢署早為郎長遊鳳沼傍
雞知壺水候馬識火城光
每

載趨曹筆時薰直省香邊書無一羽冠益得翱翔

甘露寺

勝地江山壯名林歲月遙
剎藏京口樹鐘送海門潮
月黑龍光吐天清蜃氣銷
何當尋狼石閒坐話前朝

何隱君小墅

移家營別墅一逕竹扉開
泉滿疏渠放花多借地栽
壁間田器挂窗裏浦帆來
自戀幽居樂誰言是棄材

贈張明府

聞道彈琴處門前柳帶沙海珍通估市湖稅減漁家暮
港迷荷葉秋田間豆花亂來無此地君政亦堪誇

溪上

秋色共溪長游人笑語涼萍開天倒影蓮墮水流香魚
留和星漉禽置帶雨張從今搖桂棹不必問瀟湘

寄錢塘諸故友

年少客名都狂游每共呼荷深箬在舫竹靜矢鳴壺明
月潮千里殘陽雨半湖故人能念否歡意共來無

題張靜居畫

楚客寫荆岑秋雲隔浦陰人家連橘塢水廟映楓林亂
後清游歇愁邊遠色深相看休向晚怕有峽猿吟

答陳則見寄

何由慰遠思獨詠寄來詩行路方難日清秋欲盡時江
多驚鴈火樹少宿鳥枝早晚如相見應憐有鬢絲

晚次西陵館

匹馬倦嘶風蕭蕭逐轉蓬地經兵亂後歲盡客愁中晚

渡新潮急寒山舊驛空
可憐今夜月相照宿江東

送僧恬歸靈隱

遊方應未久柳色變新年
在路逢春雪還山訪冷泉
鐘催投寺錫燈照泊江船
法意休多問無言即是禪

江上寄王校書行

寥落舊歡違江邊獨掩扉
鄰家聞暮笛客舍試春衣
宿鳥歸山亂行人渡水稀
相思比花絮斜日繞城飛

微恙江館夜作

寒燈坐江館愁逼歲闌珊苦恨應催老微疴似忌閒難
前星列屋鴈外月臨灣明日將來藥身猶懶入關

送柔上人得船字

叢林初結夏東去又飄然罷說天台講行叅雪竇禪殘
經松下几遠磬月中船不用悲離別師今絕妄緣

中秋琵琶洲宴集得紅字

香霧夕濛濛孤高桂樹東影踈林際月涼近水邊風重
露流杯綠繁星亂燭紅明年江海上高會與誰同

過劉山人園

欲問幽棲處花溪逐澗迴夕烟羅幕卷春雨藥房開野
鶴知琴意山蜂給酒材城中少閒客誰解引車來

送胡銓游會稽

山水獨行徧苔溪仍剡溪衣逢新火減舟渡雜花迷黃
絹尋碑讀紅裙賭墅攜蘭亭舊基在觴詠付新題

鐘山雲齋圖

山勢識龍蟠香臺擁翠巒草堂猿嘯晚蕙帳鶴驚寒雲

擁梁僧塔苔封宋帝壇昔年游歷處今向畫中看

次韻陳留公見貽湖上行屯之作

湖陰巡壘罷緩服上仙舟景好看宜晚詩清賦為秋葉
應隨鳥散山欲趣波流亦有東遊興空憐未得酬

鄰家桃花

春色東家出相窺似有心曲垣遮自短別院閉還深影
動疑人折香搖妒蝶尋好風時解意吹片拂羅襟

和王較理夜坐

池暝花如霧蒼蒼月照開梁空雙燕睡簾暗一螢來
散誰家笛人違此夜杯如何對清景愁思卻相催

宿道王蘭若

借榻到僧扉雖安未是歸暝禽愁雪意夜篠助風威
燭盡思燃帶衾寒起覆衣不知孤棹去明夕更何依

除夕客中與家兄守歲

雨雪遠村中猿鳴旅館空守爐銷宿凍停燭待春風
有恨能催老無文解送窮却憐今夕酒還與弟兄同

西園閒興

看到竹過鄰園林獨卧身鳥聲閒似野人意倦如春殘
雨驚池樹斜陽照隙塵如何堂上客不及燕來頻

步至東臯

斜日半川明幽人每獨行愁懷逢暮慘詩意入秋清鳥
啄孤楊碎蟲懸落葉輕如何得歸後猶似客中情

郊墅雜賦七首

江水舍西東鄰家是釣翁路痕深草沒井脈暗潮通籬

隔蔬邊雨門開竹下風不因時賣畚何事入城中

幽事向誰誇孤吟對晚沙浣衣江動月繫艇岸垂花行
蟻如知路歸鳧自識家一尊茅屋底隨意答春華

移家到渚濱沙鳥便相親地僻偏容懶村荒却稱貧犬
隨春鮓女雞喚曉耕人願得無愁事閒眠老此身

紛紛謝人役寂寂戀吾居細雨春雩後斜陽社飲餘岸
花飛趁蝶池葉墮驚魚好了公家事休令吏到廬

路迂橋斷處門靜犢眠時孤墅藏羣柳諸田灌一陂僮

閒春作少婦懶午炊遲誰道花源好還令太守知
入夜潮侵戶經秋雨壞垣里人淳少訟田父醉多言稻
蟹燈前聚莎蟲機下喧自應耽野趣不是戀鄉園
欲沽嗟市遠煙火隔江波客到寒齋少人歸晚渡多汗
書燈燼落驚枕櫓聲過豈敢愁荒寂時危免負戈

臨頓里

沐罷便輕幘消搖詠晚天清風蘇病鶴驟雨集鳴蟬舊
史堆緗素新經錄洞玄誰知城郭裏別自有林泉

夜起觀月

一春夜多雨今宵初月明窗閒幽夢覺起憶故園行露
下花微委煙中鳥忽鳴誰同賞清景惆悵倚前楹

晚霞獨酌南樓

倦客豈遷客故鄉非異鄉鱸肥蓴菜紫鴈響柳條黃湖
濶已秋雨樓高猶夕陽登臨何必賦把酒據胡牀

題宋迪晚煙歸舍圖

落日下山嶺行人逢已稀煙中望田舍水次掩荆扉鳥

亂夕林暗草多秋遲微家人應候我賣畚到城歸

送鮑修撰出官關中

辭朝西入陝車發動征塵小麥行時熟啼鶯別處頻關
前周故尹灞上漢遺民直院青綾舊臨川赤組新山連
樂遊苑樹繞富平津君去方年少還能論過秦

翫花池

桃枝蕪杏葉春色繞宮池正愛紅繁處還憐綠淨時花
香泛幽吐媚影照清漪垂條看妓折墮萼見魚吹盃涵

明月瀉舟逐彩霞移水流花落盡君王醉不知

詠夢

的的緣愁得濛濛與醉和輕隨雲浩蕩暗越嶺嵯峨夜
店嗟偏短春閨思最多關山歸識路江渚去淩波蝴蝶
誰家信鴛鴦別浦歌靜嫵風動竹鬪怯雨鳴荷寂歷窗
扃紙低遲帳捲羅知情惟枕共送恨忽鐘過縞袂香猶
在朱絃字不磨陽臺莫重問千載笑巫娥

奉迎車駕享太廟還宮

鳴蹕聲中曉伏迴錦裝馴象踏紅埃半空雲影看旗動
滿道天香捧駕來漢酎祭餘清廟閉舜衣垂處紫宮開
禮成海內人皆慶獻頌應慙自乏才

九日陪諸閣老食賜糕次謝授經韻

叨陪講席接詞曹曉禁霜花點素袍院貯圖書西掖靜
雲連宮殿北山高故園莫憶黃花酒內府初嘗赤棗糕
最愛鳳毛今復見便令池上一揮毫

送沈左司從汪叅政分省陝西

重臣分陝去臺端
賓從威儀盡漢官
四塞河山歸版籍
百年父老見衣冠
函關月落聽雞度
華嶽雲開立馬看
知爾西行定回首
如今江左是長安

吳僧日章講師赴召修蔣山普度佛事既罷東歸送別

萬人擁坐聽潮音
寶刹曾迂玉駕臨
佛法晨敷三藏秘
帝恩春及九原深
鍾山坐處花頻雨
練浦歸時樹欲陰
擬問楞伽嗟已別
楚江飛錫暮沈沈

清明呈館中諸公

新煙著柳禁垣斜，杏酪分香俗共誇。
白下有山皆繞郭，清明無客不思家。
卞侯墓上迷芳草，盧女門前映落花。
喜得故人同待詔，擬沽春酒醉京華。

送易左司分省廣西

朝廷特念遠民深，畫省分官出桂林。
油幕乍開依漢節，卉衣時到貢蠻金。
四時花發山多暖，半日嵐開市尚陰。
虞帝祠前黃竹裏，相思莫聽鷓鴣吟。

送葉判官赴高唐時使安南還

銅柱巖前使節過，貢隨歸騎入京多。
一官暫遣陪成瑨，片語曾煩下趙陀。
曉拜賜衣辭絳闕，秋催征棹渡黃河。
政餘好賦登臨咏，聞說州人最善歌。

寄題安慶城樓

層構初成百戰終，憑高應喜楚氛空。
山隨粉堞連雲起，江引清淮與海通。
遠客帆檣秋水外，殘兵鼓角夕陽中。
時清莫問英雄事，回首長烟滅去鴻。

送丕上人還四明育王寺

解夏還尋舊寺棲滿船黃葉過長溪袈裟影入秋山遠
舍利光懸夜塔低鵝識講時常繞聽猿知定後不驚啼
卻慙擾擾塵中客覺路如今去尚迷

送吳生赴汴省其父指揮

都亭槐雨淨朝埃彩服逢秋試剪裁定遠未歸雙節在
孝廉初去一船開城依梁苑煙中閉河繞隋堤樹裏迴
家慶拜餘尋舊跡夕陽騎馬過繁臺

夜聞吳女誦經

雲窗月帳散花多
閱讀金經夜若何
嬌舌乍彈鶯學語
芳心已定井銷波
尼師曾教青蓮偈
女伴徒為白苧歌
聽處若迷空色相
應須愁殺病維摩

遊南峰寺有支遁放鶴亭

每向人間望碧峰
石門今得問幽蹤
路緣風磴泠泠策
寺隔煙蘿杳杳鐘
窗下鳥來多墜菓
亭前鶴去只高松
一龕願借依香火
莫道詩人少戴顓

次韻楊署令雨中卧疾

雙桐分蔭曉池清乍喜新晴覺病輕
蛛曳林風吹欲斷鷺經沙雨洗偏明
吟多稍怯開窗寫卧久渾忘出市行
不道春歸踰一月起聞歌鳥尚疑鶯

送何記室遊湖州

暮雨關城獨去遲少年心事蒯緱知
故人當路輕貧賤倦客逢秋惡別離
疎柳一旗江上酒亂山孤棹道中詩
水嬉散後湖亭廢此去煩君弔牧之

賦得寒山寺送別

楓橋西望碧山微，寺對寒江獨掩扉。
船裏鐘催行客起，塔中燈照遠僧歸。
漁村寂寂孤烟近，官路蕭蕭衆葉稀。
須記姑蘇城外泊，烏啼時節與君違。

送何明府之秦郵

馬前風葉助離聲，楚驛都荒不計程。
一令尚淹三縣事，幾家曾見十年兵。
夕陽遠樹烟生戍，秋雨殘荷水繞城。
父老不須重歎息，君來應有故鄉情。

婁江寓舍喜王七隅見過卻送還郭

送君只過孝廉橋不似君來訪我遙
路未同歸鴻杳杳門方孤掩竹蕭蕭
遠愁忽與鐘聲至殘醉微兼燭燼銷
莫道扁舟難重過寒江日日有回潮

答呂山人見寄

一罷僧房看竹期行吟何處復相隨
烟波遠渚難尋路風雨幽窗忽送詩
故舊誰非嗟別者鄉園同是憶歸時
莫愁孤館春寥落且向江干避亂離

送周省郎之海虞判官

黃茅連野邑城荒佐邑初
煩舊省郎鴈起海風吹暮角
雞鳴關月照晨妝
讀書臺下逢人少
濡墨廳中憶尉狂
君到官曹無事日
一尊為我酌斜陽

贈林泉民張夢辰次張貞居外史韻

雨船幾度載狂客
詩卷平生隨老翁
林下自成廩鹿友
世間相去馬牛風
曉窗炊熟露葵紫
秋寺寫殘霜葉紅
他日倘修耆舊傳
著君應在隱淪中

倚樓

西館樓前見鴈行
桂花初白柳枝黃
凭欄有客迎秋思
捲箔誰家出晚妝
未放離魂尋楚雨
已看歸鬢點吳霜
自憐對酒還惆悵
不及分司御史狂

送錢塘守

繁華莫歎異昇平
到郡初煩露冕行
幙下吏書催署字
湖中妓舫歇歌聲
潮來兩渡皆侵岸
日落諸山半入城
休沐南屏煩一到
松間尋我舊題名

陪臨川公遊天池

騎馬尋幽度嶺遲老僧曾識使君誰門開紅葉林間寺
泉浸青山石上池殘果已收猿食少枯松欲折鶴巢危
壁間不用題名字無限蒼苔沒舊碑

宿張氏江館

極浦荒雲一棹行遠投江館駐宵程客中得酒銜悲喜
亂後逢人說死生木葉未空寒鳥聚海潮初上曙雞鳴
政憐此地無驚擾歸夢如何又入城

送李使君鎮海昌

海風千里捲雙旌
按轡初聞屬部清
人雜島夷爭午市
潮隨山雨入秋城
鳴狐不近睢陽廟
突騎猶屯廣利營
肯掃帳中容我醉
夜深燃燭卧談兵

賦得惠山泉送客遊越

雲液流甘漱石牙
潤通錫麓樹增華
汲來晨冷和山雨
飲處春香帶瀑花
合契老僧煩每護
修經幽客記曾誇
送行一斛還堪贈
往試雲門日注茶

寄題張著作菁山隱居

霞映青山似赤城，歸棲聞已謝時名。
半湖殘雨收虹影，幾樹斜陽帶鳥聲。
竹下逢僧投杖揖，籬間候客抱琴行。
平生應笑王夷甫，末路方言少宦情。

喜逢賀叔庸送還錢塘

暫來還去獨翩翩，賀監清狂已欲遷。
三日小樓延解榻，幾人南浦送回船。
鴈呼舊侶投雲外，梅試初花在雪前。
歸去西湖柳邊宅，應娛鶴髮慶新年。

送伊兵曹赴邊

少年恥著惠文冠
幙下時時把劍看
官燭未銷雞送曉
軍笳忽動馬嘶寒
關連雲樹征途迴
塞接霜蕪戰地寬
見說長平門下客
奇材惟有一任安

吳下聞梁賓客子天爵復送還會稽

識君京國暫相從
別去堪憐此再逢
共把一盃官市酒
初聞半夜客船鐘
吳洲鴈落潮痕淺
越嶠猿啼樹影重
曾作尊翁舊僚屬
臨分離恨倍人濃

江村

南園薰風吹葛衣汀花未落岸花稀
水神廟下莎侵路江叟門前柳映磯
犢卧已知耕耒歇鷗驚長見釣船歸
天隨宅畔吾曾住留得閒醫掛夕暉

田園書事

西園春去綠陰成已覺南窗枕簟清
簾捲斜陽歸燕入池生芳草亂蛙鳴
葉過穀雨花猶在衣近梅天潤易生
獨坐正知閒晝永吟餘消盡篆烟輕

靈巖寺

閒上香臺望下方
漁村樵塢畫蒼蒼
傾城人遠苔生逕
歸寺僧稀葉滿廊
雲散池邊留塔影
雨來天外失湖光
廢興皆幻何須問
獨自吟詩送夕陽

喜宋山人見過

攜琴遠趁渡江船
煩覓幽蹤浦樹邊
別久忽看梅早發
話長應讓鴈先眠
一冬多暖天無雪
半夜初寒月有烟
回首舊遊君莫念
歸來好種荊門田

上已有懷

春寒渾未減征衣愁對佳辰坐掩扉江上琴書留滯久
水邊車馬祓除稀閒園細雨梨花落廢苑平蕪燕子飛
欲覓蘭亭會中友幾人遷謫未能歸

蘆花簾

莢茸織出緯蕭機未許蝦鬚獨銜奇寒雪照庭晴不捲
白雲當戶畫長垂恍疑柳絮風穿早不管梨花月到遲
自是楚江秋一片移來休使白鷗知

附 佳 和 詩

璇宮皇女不停梭
織得疎簾映薜蘿
漁父閒眠釣畔雪
洛神微步隙中波
還同魯縞穿風薄
詎比湘筠染淚多
幾度塞鴻飛不過
蕭蕭月影恐張羅

過吳淞江風雨不可渡
晚覓漁舟抵松陵官館
風雨方知客路難
飛鴻相逐渡江湍
港收漁市舟歸晚
門掩官廳燭對寒
此地昔年曾遠宿
何人今夕共清歡
枕邊不為江聲急
夢寢憂時未得安

梅花六首

瓊姿只合在瑤臺誰向江南處處栽
雪滿山中高士卧月明林下美人來
寒依疎影蕭蕭竹春掩殘香漠漠苔
自去何郎無好詠東風愁寂幾回開

縞袂相逢半是仙平生水竹有深緣
將疎尚密微經雨似暗還明遠在煙
薄暝山家松樹下嫩寒江店杏花前
秦人若解當時種不引漁郎入洞天

翠羽驚飛別樹頭冷香狼籍倩誰收
騎驢客醉風吹帽

放鶴人歸雪滿舟
淡月微雲皆似夢
空山流水獨成愁
幾看孤影低徊處
只道花神夜出遊

淡淡霜華濕粉痕
誰施綃帳護香溫
詩隨十里尋春路
愁在三更掛月村
飛去只憂雲作伴
銷來肯信玉為魂
一尊欲訪羅浮客
落葉空山正掩門

雲霧為屏雪作宮
塵埃無路可能通
春風未動枝先覺
夜月初來樹欲空
翠袖娉婷依竹下
白衣瀟灑住山中
寂寥此地君休怨
回首名園盡棘叢

夢斷揚州閣掩塵幽期猶自屬詩人立殘孤影長疑夜
看到餘芳不是春雲暖空山栽玉徧月寒深浦泣珠頻
掀篷圖裏當時見錯愛橫斜却未真

歸吳至楓橋

遙看城郭尚疑非不見青山舊塔微官秩加身惟幻境
鄉音到耳是真歸夕陽寺掩啼鳥在秋水橋空乳鴨飛
寄語里閭休復羨錦衣今已作荷衣

石牛

一拳怪石老山巔
頭角崢嶸幾百年
毛長紫苔春夜雨
身藏青草夕陽天
中宵望月何曾喘
盡日看雲自在眠
惱殺牧童呼不起
數聲長笛思悠然

吐月峰

四更棲鳥驚山白
初上月起開東閣
看正在雲峰缺

題雜畫

夕陽數峰遠
靄靄江南思
烟外有鐘聲
山僧獨歸寺

為外舅周隱君題雜畫五首

斜陽榜釣船秋色滿江天彷彿吾家近沙村落鴈邊
白鶴忽飛還松杉靄然暝明月出溪橋照見支筇影
落葉帶回吹荒筠冒幽石池上鳥鳴時閒齋掩秋夕
山深嵐氣寒高齋掩窗卧林間踏葉聲知有樵人過

西寺晚歸

遠寺別僧歸隨鐘出煙嶺犬吠竹林間斜陽見人影

江上酒家

門戶映垂楊春槽酒聲瀉幾度望高帘歸帆雨中下



鴈

初到別胡沙樓頭度影斜江南秋月好隨意宿蒹葭
寧真道館夜觀茆隱君畫

看山如見君君家在山下仙館憶君時明燈對圖畫
晚尋呂山人

小艇載琴行松花落晚晴君家最可認隔樹有書聲
喜從兄遠歸

聞汝歸舟到相迎只恐遲方當見時喜還憶別時悲

林下

樹涼山意秋雲澹川光夕林下不逢人幽芳共誰摘

得家書

未讀書中語憂懷已覺寬燈前看封篋題字有平安

蔡村田家

田中未聲歇烟火西林起獨立候歸人柴門夕陽裏

夢中作

悠悠衆擾去寂寂孤吟歇雨過滿窗涼高林上明月

山中別寧公歸西塢

一上香臺看落暉
沙村孤樹晚依依
老僧不出青山寺
只有鐘聲送客歸

過保聖寺

隔江寒霧隱棲臺
遠逐鐘聲放艇來
亂後不知僧已去
幾堆紅葉寺門開

宮女圖

女奴扶醉踏蒼苔
明月西園侍宴迴
小犬隔花空吠影

夜深宮禁有誰來

過山家

流水聲中響緯車
板橋春暗樹無花
風前何處香來近
隔崦人家午焙茶

雲山樓閣圖

碧樹香臺錦繡連
畫師應見亂離前
如今風景那堪寫
廢寺空山鎖暮烟

雨中春望

郡齋高望見江頭
油壁行春事已休
落盡棠梨寒食雨
只應啼鳥不知愁

逢吳秀才復送歸江上

江上停舟問客蹤
亂前相別此相逢
暫時握手還分手
暮雨南陵水寺鐘

次韻春日漫興

水邊簾幙遠籠花
遊女時時出浣紗
記得橫塘沽酒處
畫船明月載琵琶

偶睡

竹間門掩似僧居
白豆花開片雨餘
一榻茶烟成偶睡
覺來猶把讀殘書

舟歸江上過斜塘

漫漫村塘水沒沙
清明初過已無花
春寒欲雨歸心急
嬾住扁舟問酒家

秋江晚渡圖

鷓鴣飛盡一洲蘋
帆帶秋雲度遠津
底事愁看畫中景

昨朝曾送渡江人

舟次丹陽驛

沽酒來尋水驛門
鄰船燈火語黃昏
今朝始覺離鄉遠
身在丹陽郭外村

送郭省郎東歸

金陵兒女踏春陽
金陵客子正思鄉
一盃況復送君去
目斷飛花江水長

桃葉渡頭聞唱歌
孤帆欲發奈愁何
君歸是我來時路

山水無多離思多

客中憶二女

每憶門前兩候歸
客中長夜夢魂飛
料應此際猶依母
燈下看縫寄我衣

雨中過山

春雲晦靄澗奔渾
風雨行人過一村
不似山家深竹裏
乳鳩啼午未開門

袁安

洛下人家懶去干閉門僵卧雪漫漫立朝不附熏天勢
應為平生耐得寒

二喬觀兵書圖

共憑花几倚新妝玉女陰符讀幾行銅雀那能鎖春色
解將奇策教周郎

江行

家家漁網映迴橋春水初生沒樹腰客路江南烟雨裏
綠蕪芳草恨迢迢

背面美人圖

欲呼回首不知名背立東風幾許情
莫道畫師元不見傾城雖見畫難成

風雨早朝

漏屋雞鳴起濕烟
蹇驢難借強朝天
却思春水江南岸
閒聽篷聲卧釣船

江上雨中

江漲隨溫欲到門
濕雲依樹易黃昏
幽居常日無來客

何況瀟瀟雨滿村

過北莊訪友

淺水平沙凍鴨眠
秋聲和鴈石橋邊
尋君兼得尋詩興
野樹江雲欲雪天

宣和所題畫

御翰親題畫最工
疎枝野鳥怨秋風
那知回首宣和殿
物色淒涼與畫同

送徐山浩師還郭

欲共歸舟懶入城再三難判別時情聊題詩卷投君袖
相伴秋江此日行

紅梅

春暈冰綃倚竹低羅浮卻似武陵溪詩人從此來相覓
雪滿空山不復迷

題桂花美人

桂花庭院月紛紛按罷霓裳酒半醺折得一枝攜滿袖
羅衣今夜不須薰

送李丞之歸安

苔花微雨落秋汀
一路青山棹幾亭
預喜哦詩無俗吏
兩松相對縣丞廳

田舍夜春

新婦春糧獨睡遲
夜寒茅屋雨來時
燈前每囑兒休哭
明日行人要早炊

讀周記室荆南集

生別猶疑不再逢
楚天雲樹隔重重
愁來讀盡荆南稿

風雨空齋掩暮鐘

贈真上人

花下攜琴見此僧
自言開法在金陵
十年江海遊應遍
老去空山對一燈

題道上人墨梅

笛裏寒梢蕊自開
幾年風雨不生苔
山窗夜半禪初定
應喜無香觸鼻來

元夕聞城中放燈寄諸友

江邊寒雪閉寒扉坐戀梅花未解衣却憶今宵滿城月
看燈人醉踏歌歸

題瀑布泉

千山雲頂一泉飛仰面時驚雨濕衣彷彿香爐峰下看
滿溪紅葉訪僧歸

春睡圖

妝殘嬌睡帶餘醒鸚鵡當窗不敢驚誰信上陽宮內女
一春愁絕夢難成

巨然小景

隔溪山閣映秋開坐久鐘聲度水來遙指石橋村樹杪
一僧歸處是天台


中秋無月無酒

桂樹香寒掩畫樓江雲黯淡蔽天秋道人莫喚嫦娥出
照見空樽却是愁

慰人悼亡

朱字瑩篋委網塵月明不見理絲人鏡臺窗下櫻桃樹

應是當年折剝春



石倉歷代詩選卷二百九十三

欽定四庫全書

集部

石倉歷代詩選卷二百九十四

詳校官庶吉士

臣

龍廷槐

侍讀_臣孫球覆勘

總校官進士

臣

朱

鈐

校對官中書

臣

范來宗

謄錄監生

臣

李鳳丹

欽定四庫全書

石倉歷代詩選卷二百九十四

明 曹學佺 編

明詩初集十四

楊基

感懷

鵲巢知避歲終為鳩所居巧者勞不足拙者安有餘溪
翁夜結網山人朝煮魚隆準入關中不讀半卷書當時

微張韓乃與勝廣俱大拙乃至巧巧者復何如

其二

羈鷹斂六翮棲息如鷦鷯秋風颯然至聳目思凌霄英
雄在承平白首為漁樵匪無搏擊能不與狐兔遭長星
亘東南壯士拭寶刀落落丈夫志悠悠兒女曹

其三

浮雲從何來本是山川氣寸陰不終朝一雨浩無際江
河會交流草木奮妍麗但知潤澤功不識真宰意天風

吹玄陰白日照厚地理亂自有常千載可生致

秋夜言懷

鮮鮮籬邊菊憾憾庭下蕙蕙氣日已銷黃花自妍麗復
恐清商激幽芳亦凋瘁褰衣步廣除露白月在地鵲飛
林影空蟲語牆陰細昔賢悲絲染往聖嘆川逝少壯不
我留臨風發長喟雅志諒難酬蹉跎老將至

其二

西齋近寒徑枯葦接深篠秋風颯然至索索鳴不了拋

書坐孤榻眼澁燈暈繞窻破斜隙明漏斷餘更悄平生
所欣遇此夕紛內擾假寐入冥思南枝有歸鳥

其三

夜坐復不樂起行亦無悰徘徊二者間百憂結心胸歲
事忽已遷復共喪亂逢一身愧無補況乃祿萬鍾月林
鵲翻翻風江鴈噍噍棲止苟有託遲暮還相從

其四

高梧蔭崇岡衰草被廣陌風微夕露涼星淡秋河白芳

辰蕪物謝孤抱緣愁積佳人在何許悵望江浦隔昨會
月初弦徘徊又生魄

登靈巖和韻周左丞伯溫饒大叅介之

單艦集羣英席窄坐每盞烟橫半掩寺木落全見塔斜
流出渠分曲徑轉溪合村妝妍醜並野話悲笑雜童操
吳音聞僧作梵偈答霜苔滑難躋露棘朽易拉磴紆螳
緣樹扉敞蝸啟闔娛賓列五豆禮佛過三帀晴崖暝憂
雨秋洞寒凝臘窻攀盜果猿簷入避鷓鴣掬池萍沾袖

憩石蘚污衲琴忘荒臺弄屨響回廊踏值險慮思筇得
奇即傾榼華年倏川駛雅量浩海納嘯歌激欵歔雄辯
肆交沓狂遊類飲酎薄宦避嚼螭終當謝塵鞅掃屋分
坐榻

雨中效韋體寄季迪止仲道衍仲溫四首

屢覲歡未終乍違離緒繞冥冥鄉國陰獨坐空齋曉鵲
啼春樹密花落流鶯少不有郢中吟何由寫懷抱

又

久靜厭紛俗齋居自玄處遙知久默暇共此瀟瀟雨屢
驚芳節換暫覺清音阻欲扣竹間扉棋聲隔春渚

又

叢林翳重岡迢遞僧居獨憑軒一帳望春雨蘼蕪綠泉
香花落磴窻暝松園屋憶爾諷經餘袈裟坐深竹

又

別君俄兼旬芳景已云暮南風吹新綠欲暗庭前樹
鳴孤驛曉鴉散春城曙眎此慰離憂新知忽成故

遊北寺竹林

僧居古城陰迢遞通萬竹林
光落虛牖坐愛衣裳綠齋
餘孤磬晚茶罷微煙續道人
悟重玄淡然無衆欲譬彼
石根泉高亭湛寒淥

雨中期袁宰不至

晨興罷巾櫛撫卷對秋渚
幽人期不至值此瀟瀟雨
豈緣俗情牽致此清興阻
呼童掃庭蕪落葉深幾許
更採石田芝空齋遲君煮

東臯為馬仲蔚賦

初夏藹衆綠霏霏繞園霧橫書散輕策愜我林臯趣衣
涼水氣襲屐潤苔痕汙雨菌結芝肪烟莎綠鶴步意銷
念慮寧景適真樂遇衆妙入靜觀前非覺神悟江花自
孤婉芳草忽已暮為鼓朱絃琴南風在庭樹

觀魚

池陰樹影涼白小紛成隊吹絮圓漚續觸荷清露碎俄
沈靜却浮忽遇驚還退幸免釣絲憂江鱸且充鱠

上已遊虎丘值雨寓平遠齋

層軒構崇丘綠樹帶吳苑
鳩鳴春竹靜鶴下煙汀遠
初登已神暢稍久竟忘返
松高急雨過草弱微風偃
幽潭閱靈跡氣濕龍蜿蜿
俯深戒臨危歷險知步蹇
歸途極遐矚蒼茫失西巘

贈真性空

上人真如心悟徹物我間
廿年住名山已復到彼岸
六觀會萬有一覺破諸幻
袈裟坐綠蘚鳥悅林影散
琴清

風在竹碣古石當澗贈以青蓮花搖搖落秋瓣

聽松軒

鳥棲衆喧寂月出萬壑靜秋聲松外來歷歷生我聽繁
音雜宮徵空響調竽磬風細覺潛消山虛故相應幽人
掩書坐瞑目兩耳定聲聽忽兩忘道然發孤詠

僧寺感秋

一榻卧僧室歸夢夕九至燈昏燼垂華香斷灰成字斜
光破窻月急響虛簷吹遙想宦遊人應憐此中意

長洲春

縠波流暖雲花光艷綠
簪津頭洗紅女蝴蝶上羅裙
羅裙秋水上明璫
搖白檠飛下雙鴛鴦
溘溘湖水響

橫塘晚

川氣夕氤氲愁雲凝晚綠
蘭舟蕩秋水東向橫塘宿
橫塘花正開紅桃間竹栽
誰家織白苧機聲度水來

梧宮夜

桐堦白露下濕螢光炯炯
銅盤燒蠟黃秋衾夢魂冷
粉

淚鉛華滴雲鬢秋蟬整何處玉鑾聲芙蓉嘆孤影

楓陵秋

楓樹落清曉野煙結愁陰聲傳燒竹火人語滄波深
飛秋水黑蛩吟涼露白江月參差光芙蓉照芳魄

越來溪

遠岫如蛾眉紫菱蓋綠漪小娃木蘭槳採菱上溪歸
風搖白芷撩亂蘋花起疑是越兵來旌旗照秋水

滄浪波

入苑綠泱泱，紋融暖光東。
風吹白浪照，見赤龍堂龍。
堂負貝闕陰，火春波藝鮫人。
賣髯綃，夜唱明月。

綺川遊

川水東北流，川花照青樓。
龍船載鳳吹，日來川上遊。
沙明屬玉止，苔香翡翠留。
漁郎蒲葉底，網得雙吳鉤。

茂苑思

輦路秋蓬滿，野香團綠濕。
嬪娥粉黛愁，嫣花鉛露泣。
鶯聲舊時好，玉砌秋歸早。
東家蝴蝶飛，烟姿滿芳草。

淮陰祠

朝登歌風臺暮入淮陰祠祠荒屋瓦落古木聲差差當
時握漢兵劉項交相持舉足有輕重不負高帝知區區
假王封如何遽見疑良平一躡足帝心即轉移全齊七
十城實為陷穽機後來雲夢遊此禍乃致之盧綰且稱
王恥與絳灌隨居常獨怏怏握手逢陳豨事起倉卒間
不意成誅夷呂后固不仁鄼侯亦忍為先王重報功無
乃此道虧至今淮水南落日啼鳥悲津頭問漂母一飯

竟哀誰

送叅政錢誠夫之淮安

潮落大江渾鳥啼曙色分公侯千萬騎送別隘人門威
儀督府嚴禮秩節度尊兩淮甲冑士十年弓箭痕南陽
與豐沛自古重承恩

客館秋思

閒齋閤秋陰弱蕙風屢偃蕭蕭微涼至坐怯疎簾捲哀
蟬聽漸急歸燕嗟已晚忽動故園思山川匪遙遠

白髮

白髮無貴賤愁人先得之嗟我愁苦多四十髮有絲我
愁實累髮愁豈髮所為白髮勿笑我可喜不可悲紛紛
霄壤間幾人得如斯

歲暮書事

薄雲靄微陰江遠日易墮蒼然望平楚正與西山對冥
冥孤鴻矯接接昏鴉退感茲歲年暮矧爾時俗背賴有
谷中蘭參差可為佩

汉口與洪鎮撫夜話

我船行何遲君船下來急烏啼月初上鷗靜露已濕寒
衣步危沙細語成久立回瀾激空穴風響相噓吸君才
誠國士富貴可俯拾臨流莫看劍恐駭寒江蟄

霧中望新淦縣

隔窻聞鷄聲咫尺望新淦江寒白霧起驛樹連城暗瀾
瀾浦激濶晃晃日色淡亦有渡江人津頭解孤纜

自湖西發舟望瀑布

泊舟廬山下北風吹不休山靈知我來故以風相留
寒衣陟危沙曠然得平疇柳色綠尚淺芳草青以柔
仰觀瀑布泉復作河漢流爐熏既冉冉鹿鳴亦呦呦
乃因淹留中終得此日遊向非風濤力那能極冥搜
作詩寓所感萬事無先謀

望岳麓

我為長沙客不醉長沙酒為愛岳麓山繫舟城邊柳
峰巒一何秀膏沐春雨後蛾綠淨洗妝方知朱鉛醜
所嗟

山中寺顏圯想已久嶙峋北海碑千載獨不朽信為神
靈惜長使山鬼守褰衣欲訪古日落辰在酉荒烟鳥雀喧
竹密虎兕吼老眼念後期未知重來否

湘女

湘水綠瀾瀾湘山碧峨峨空明影上下但覺禽鳥多我
方住輕橈聽彼湘女歌湘女淡掃眉素頰垂兩螺幽蘭
結短佩徐行拂青莎春風吹衣裙芳香動微波淑質自
妍麗不待綺與羅真修慎所適窈窕山之阿盈盈青樓

婦日暮將如何

湘江道中思常宗

暮江散微雨風定波自碧一鷺立不飛雙鴻遞相直餘
烟菱女唱新月漁郎笛此處忽懷人相思杳何極

過道士泐

茲山如青蜺俯飲江水曲邦人失偉觀目以道士泐中
有百歲墳石室蔭藂木當時涸三泉鳬鴈秘金玉畋師
辟虎豹武士禁采牧未為茲山榮竟為茲山辱至今湘

漢流到此屢回伏春風吹急雨石斷苔蘚綠亦有斧斤聲丁丁响幽谷

零陵感春

舟行苦淫雨雨晴身亦輕暢如辭喧卑振衣登高明羣芳沐春容瑩然矚目清萬綠陰蕤蕤孤禽語嚶嚶憶昨初戒途飛雪沾我纓桃李寂未華一二春草生漂泊復幾時花落已縱橫花落非足惜念此歲序更慷慨向秀笛從容桓伊箏曠達自不凡悲憤何當平嗟嗟高世士

疊疊勤修名

姑蘇臺

姑蘇臺下清江晚斜日江心照闌檻臺上西施醉捧心
江邊東越愁嘗膽鴟夷裹屍去不還麋鹿散迹遊其間
功成却羨陶朱子一葉扁舟弄雲水

約范園看杏花

西園杏花如雪明年年看花春滿城烏紗小帽插花舞
碧羅窄袖穿花行花今仍發當年道淨洗胭脂看淡掃

僻處休嗟車馬稀
內家園裏猶芳草
東風回首幾人存
粉悴香憔不忍論
錦瑟金錢誰赴約
鳳笙龍管謾招魂
月斜徐步花枝下
欲折生紅淚盈把
莫怪無人看此花
當年已歎遊人寡
風雨陰晴每願違
便須攜酒趁春暉
明朝青子花零落
鶯老梅酸蛺蝶飛

食燒笋留題陳惟寅竹間

春雷一聲萬簪玉
參差亂迸莓苔綠
斬來掃葉當遲燒
何異燃其煮秋菽
登盤查牙玉版肥
焦尾碎剝蒼龍皮

山人大嚼無以報寫作林間燒笋詩

畫為包師聖題

疎簾半捲絲絲雨菱葉荷花暗江渚水近松深徹夜涼
不用開襟搖白羽隔岸人家住綠陰偶來聽我坐彈琴
聊將白雪倚蘭意銷盡紅塵汗馬心

趙元畫懸崖圖

懸崖無根谷無底樓閣參差半空起不信神工斧鑿成
人間至險無如此我對畫圖猶拊膺何況崎嶇險處登

槿樹籬邊堤似掌
藕花池上月如燈

巧石雙松圖

松蟠怪誕龍形矯
石嵌玲瓏雪膚巧
何事淋漓水墨圖
高堂六月秋風早
秋風吹雲山脚動
瀑布飛來濕瑤草
翠餘危撐日月低
霜根倒插雷霆繞
山中黃葉已蓋地
獨有烟蘿青裊裊
夕露猶含碧海秋
春霞已破丹山曉
平生愛松并愛石
何異江鳧得蒲藻
醉裏徂徠若可登
人間草木慙枯槁
豫章將軍顏色好
十年走馬淮陰道

索我題詩寫壯懷詩成已覺松杉老

省掖觀梅和宋草堂韻

玉肌瘦却春風惱唇紅不褪香雲老綺窻人靜月初圓
笑覺飛瑤顏色稿羅幄銅瓶小几邊銀燈踈影硯臺前
一株初破休輕折半朵猶含最可憐宮妝近眼人爭愛
却恐愁多零落快莫教纖手嗅東風誰畫生香與真態

壬子清明看花有感

熙寧五年壬子清明眉山蘇公看花于錢塘吉祥

寺金盤綠籃獻花者五十三人有詩曰吉祥
寺裏錦千堆前年賞花真盛哉道人勸我清
明來腰鼓百面如春雷打徹涼州花始開是
其事也洪武五年基與員外方君看花於西
江省掖節值清明歲亦壬子去蘇公三百年矣
嘆公之不可見而猶以誦公之詩也因賦長句
以記歲月

吉祥寺裏千堆錦綠髮仙人對花飲腰鼓金盤五色籃

醉後猶帶花枝寢東風壬子幾清明三百年來寺已傾
沙河塘上癡兒女猶誦錢塘太守名看花我亦逢壬子
況是清明非偶耳莫論南浦與西湖楚水吳山正相似
青蓮居士識前因金粟如來見後身總不能知塵外劫
也須曾是會中人

聞鄰船吹笛

江空月寒江露白何人船頭夜吹笛參差楚調轉吳音
定是江南遠行客江南萬里不歸家笛裏分明說鬢華

已分折殘堤上柳莫教吹落隴頭花

湘中見春鴈

蘼蕪葉長春簇簇雙鴈忘機相對浴東風何事不飛歸
應念江南春草綠燕山密雪正茫茫況有桃花水滿鄉
畢竟不如歸去好楚雲湘水是他鄉

登岳陽樓望君山

洞庭無烟晚風定春水平鋪如練淨君山一點望中青
湘女梳頭對明鏡鏡裏芙蓉夜不收水光山色兩悠悠

直教流下春江去消得巴陵萬古愁

春江萬里圖

我家岷山更西住正見岷江發源處三巴春霽雪初消
百折千回向東去江水東流萬里長人今漂泊尚他鄉
烟波草色時牽恨風雨猿聲欲斷腸

留題湘江寺

瀟湘縣前山繞城綠陰滿地聞流鶯入門下馬松逕濕
椶櫚花開春雨晴山僧知我攜客至身披袈裟下榻迎

汲泉敲火煮新茗
茶香鼎潔泉甘清
龕燈照佛佛像古
舍利五色真身明
黃金布地孔翠帳
幡蓋聯絡皆珠瓊
飛來巨石卧青兕
以爪扣擊成金聲
十年足跡走萬里
福地往往迷榛荆
茲山信是無量壽
百千萬劫完不傾
乃知願力自廣大
天神守護邪魔驚
我來作禮繞三匝
寶花如雪天樂鳴
便從真如入妙覺
豈有世網能相纓
同行僚友二三輩
勸我寫石留芳名
他年老眼得再覩
風雨剝落莓苔生

皂角灘

煙蘿繡樹蒙鬆夏綠更換春花紅千山萬山無所聽
鷓鴣杜鵑啼春風穹崖爛熳高百尺快劍無痕鑱翠碧
寶氣朝凝五色霞丹光夜燭三分日我從章江出彭蠡
巴陵長沙洞庭尾看遍衡廬兩岸山行盡瀟湘一江水
輕舸短楫辭零陵似與亂石爭功能牛刀慣熟中肯綮
郢斧神捷回鋒稜男兒性命固可惜底事矜誇向羣石
鷗邊短草一枝筇牛背斜陽數聲笛

鄭州道中

北風如刀吹面裂敝裘無功塵絮折星稀日出勢尚嚴
滿袖霜花厚如雪馬上沈吟苦憶家江南十月賸春華
金錢晚菊低叢葉綠萼盤梅小樹花

寄題水西草堂

鴛鴦湖東武塘西桃花滿川蒲葉齊春風二月微雨霽
鵝鴨拍水黃鶯啼推窗只見參差柳柳色波先淡於酒
烏紗官帽半籠頭紫竹漁竿長在手平生愛讀內景書

往往適意追禽魚開門懶迎俗士駕拄杖每叩高僧廬
客來舉酒邀明月細淪松濤煮春雪但覺身無俯仰勞
安知世有東西別今年扈從奔大梁錦袍白馬青絲韉
信陵宅畔暮鴉集朱亥門前秋草黃輪番夜直中書省
霜華滿巾鬚髮冷粉署香銷紫綺袍碧梧影落黃金井
魂夢時時到草堂曲欄花藥漫分行他年得遂歸田計
多種牆陰十畝桑

留別楊公輔

紫簾凝煙碧香繞銀燈結花金粟小主人捧酒起勸賓
離別長多會長少明朝騎驢鄭圃東白沙黃葉滿林風
知君此際能相憶笑指燈花映酒紅

玉仙謠和阮孝思作

赤岸無波海塵起蟠桃枝上花成子玉仙邂逅赴瑤池
雲角凌空月如水子子干旌引素霓神廳步蹙青騾嘶
環珮流響入碧落霧鬢約掠風鬟低鸞尾金寒欹扇影
銖衣濕露香痕冷銀漢斜回星彩沈漸漸扶桑耀初景

齊州九點春微茫六龍登駕催晨光踏歌不到碧雲夢
蝴蝶牽愁愁正長綵霞一滅瑤臺路想像徒憐薜英慕
青鳥千霜去不還猶許留情向毫素

結客少年場行

情如飛絮任悠揚心與遊絲共短長花底若教連日醉
座中猶可少年狂新調錦瑟爭傳譜巧製羅囊別貯香
衣以鳳翎分縫織帶將蛇角徧鞢裝豪名獨擅秋千社
俠氣平欺蹴鞠場白璧一雙酬劍客明珠百斛買名娼

金丸挾彈章臺左寶騎聞箏太液傍梅子短牆羞擲果
桃花深塢笑分漿每嘲春比人先老不信愁如海叵量
猶有舊時桃李夢尚隨蝴蝶到遼陽

畫鴈

春渚別未久秋風來有期年年燕歸日是汝度關時玉
關萬里音書絕八月悲風三尺雪何似飛來漢水頭湘
浦蘆花洞庭月花滿寒汀月滿塘鴛鴦鸕鷀兩相忘啼
晴杜若蘼邊雨卧冷蒹葭葉上霜

庚戌元日立春試筆

柳暖已破眼花寒尚含腮臘隨除夜盡春逐歲朝來鳳
凰臺下春歸蚤龍池柳色瀛洲草一夜東風雪盡消十
年南國人空老富貴非吾願文章非我能且沽白下橋
邊酒來看金陵市上燈

又

南山雪已消北山雪盈尺信知南枝花早得春風力帝
城回首春光近柳上梅邊見春信白玉椒盤內史傳紅

羅彩帖詞臣進貧賤何足卹功名非可誇且沽白下橋
邊酒來看金陵市上花

舟抵南康望廬山

春山如春草春來無不好
鬼峩沉是香爐峰九疊屏風
圍五老嚶嚶歷歷谷鳥哀
朱朱粉粉山花開芙蓉削出
紫霧上瀑布倒瀉青天來
船頭春山重回首世上虛名
一盃酒李白雄風妙絕詩
同與徐凝傳不朽明日移舟
過洞庭蘭花斑竹遶沙汀
摩挲老子雙愁眼細看君山

一點青

雪中柳

春雪晚蕭蕭隨鶯上柳條漸將絲共結終與絮俱飄淚
粉凝啼眼珍珠壓舞腰東風自憐惜留映赤欄橋

雪中燕

燕雪兩差池相兼拂繡幃玉樓迷故壘珠箔見烏衣斜
訝衝花落輕疑掠絮飛曉寒人未起還認畫梁歸

送沙天民之無錫兼簡張彥禎

風雨送君行溪山傷我情故園春種麥高柳暮啼鶯亂
世難知已常譚愧老生茲行見張翰懷抱得深傾

謔柳

裊裊復揚揚春風折又長絮飛疑燕拂枝重覺鶯藏晚
掛初更月秋零一夜霜江邊千萬樹惟爾斷人腸

閏七夕

星橋方泣別銀渚喜重過鵲整初回駕鸞停暫擲梭歡
如前會少情比去年多可是勤耕織恩容兩度河

溪山小隱

何處溪山隱
衡門對野橋
晚風攜鶴子
春雨種魚苗
小
逕斜通竹
疎籬曲護蕉
人生閒自足
不用楚詞招

愛竹軒

為愛軒前竹
平安愜此心
雨聲西澗曉
秋影北堂深
瘦
倚差差玉
踈搖細細金
肯容扶短策
幽處一披襟

偶題

身懶交遊絕
時危感慨新
清江催短鬢
芳草怨歸人
花

落縱橫雨鶯啼淡蕩春欲搖舟楫去波浪沒平津

寄葉德彰戴叔能

江樹遠層層蒲荷葉漸增酒樽池閣雨棋局夜船燈竹
淨刪逾瘦花繁掃未能亭亭川上鷁風雨看飛騰

壺中插緋碧花索高二校書同詠

麗質鬪春華纖穠間亦嘉綠烟縈綺雪紅雨亂青霞醒
醉休相妒仙凡自一家春風忽披拂點綴舞裯斜

初夏試筆

池館已南風鶯殘藥自紅坐憐修竹裏行愛綠陰中衣
濕蕉無力羅輕扇有功欲搖孤櫂去江濶雨濛濛

方氏園居

由來種瓜地隨處即青門背俗羞營息甘貧恥受恩掛
蓑秋樹濕濯足晚溪渾欲訪韶年友漂零只獨存

又

園廬依綠水無吏索租錢歲計千株橘秋衣半畝蓮飲
先諸客醉詩許衆人傳為愛溪光好經旬獨棹船

又

回汀蕪複渚迢遞入漁邦有港皆通楫無山不到窻疎
烟春隴犢深雪夜籬尤過客停舟問而翁恐姓龐

宿高季迪京館

歲晚此相逢鄉情似酒濃語長銷夜燭夢短及晨鐘急
雪風鳴葦微雲月照松雞前趨闕去寒樹曉龍蔥

春盡始聞鶯聲

衆綠鵲園池鶯聲遠更宜愛於三月暮聽似百花時上

苑啼應早南風見自遲綠窗殘夢斷相憶海棠枝

和牛侍御懷弟之作

春草綠芊芊看雲憶惠連午陰花萼上秋色鴈行邊此
日臨池坐當時聽雨眠應將舒卷意戲彩北堂前

懷吳中赤山舊業

東林攜策處南北釋畊時一逕都緣石諸泉盡到池靜
憐松韻續涼愛竹陰移盛世容歸隱毋令解組遲

江村雜興

春墅一鳩啼橋危懶過溪徑苔都上壁野菜不分畦倚
杖妨花密看山礙竹低欲知幽隱處風雨白門西

又

判醉望愁醒愁因醉轉增已歸仍似客投老漸如僧詩
興風樓笛棋聲雪舫燈莫言渾不解此事野夫能

又

江影搖春樹潮痕摺晚沙綠蕪三尺雨朱槿一籬花去
國仍思國還家復夢家自無干祿意何必遠京華

又

江月盈盈白墟煙細細陰茅茨孤碓急機杼一燈深短
笛多悲調長歌少醉吟自憐知己盡空負壁間琴

又

咫尺南朝寺松杉覆短垣野猿偷佛供山鳥學人言石
氣晴猶濕泉聲靜却喧塵心久空寂隨意給孤園

句曲秋日郊居雜興

茅屋人歸後荒村更異鄉樹寒烏遠月江冷鴈啼霜影

賴燈相續愁緣酒暫忘明朝覽青鏡白髮幾多長

沙河舟中

旅懷歸正急春信到非遙草色風初汎蘭心雪未消驚
明欺白髮鷗快避輕橈得遂歸田計殊恩感聖朝

立夏前一日有賦

漸老綠陰天無家怯杜鵑東風有今夜芳草又明年蠶
熟新絲後茶香社酒前都將南浦恨聊寄北窻眠

晚過秋浦

淡日雨晴天江村正可憐
碧雲初見鴈紅樹尚聞蟬
一望皆秋色千山各暮烟
自慚簪組累羞近釣魚船

夜泊琵琶亭聞笛

夜泊古亭邊春愁滿畫船
青衫司馬淚紅袖琵琶絃
故國人何在澄江月又圓
誰將折楊柳三弄落花前

舟中聞杜鵑

落月祁陽路聲聲叫子規
萬山春盡夜孤枕夢回時
客自傷漂泊人誰念別離
無多眼中淚聽汝不勝悲

宿巴陵

楚有巴陵好君山對縣門暮烟湘樹遠春雨蜀江渾日
落船依岸人歸犬吠村憑虛望雲夢胸次詎能吞

零陵

地僻三苗近江回二水兼青林皆種蠟赤穀半收鹽好
武人輕鬪多祠俗尚占晚來山霧濕衣薄更須添

又

古瓦籠山葛荒碑仆石楠江晴初漲雨城午未銷嵐甕

富鯖羞鹿盃
渾酒餉蚶
邦人盡麻
枲終老不知蠶

早秋送趙景普東歸

歌斷復依依
情多忍遽違
未緣春色晚
自感故交稀
舟傍荷花宿
人先燕子歸
乍涼才却扇
多病欲添衣
驛樹風蟬咽
江祠雨鶴飛
幾時搖艇子
來扣竹間扉

元夕次韻鐵崖先生

千輪萬騎影參差
盡道風光勝舊時
珠果亂拋金並蒂
銀花交射玉連枝
星緣燈映看偏密
月為人留下轉遲

白髮老仙逢盛事綵毫先詠太平詩

和謝雪坡錢塘見寄

經旬不見謝宣城小楷烏絲寄遠情黃篾樓高春夢破
綠羅衣薄暮寒生鶴臨沙渚鷗俱浴花落江泥燕與爭
欲趁雨蓑搖短楫西湖新水蕩空明

楊村寒食

預折楊枝插繞簷荳糜香軟麥餠甜春衣未染新絲織
午篆猶分舊火添小雨送花青見萼輕雷催笋碧抽尖

不因人遠傷離別那得春愁上短髯

乘槎為日者張德元賦

百尺枯槎孕氣靈
濤花空影入滄溟
星河弄月珠胎白
銀漢流雲鵲羽青
坐拂珊瑚龍婉婉
卧看蓬島翠冥冥
不須更問君平卜
認得黃姑駕彩輶

晚春

辛夷如雪照庭柯
老去愁驚日易過
芳草漸於歌館密
落花偏向舞筵多
故人別後皆黃土
南浦春來又綠波

便欲移家勾曲住，斲芝栽玉此山阿。

春草

嫩綠柔香遠更濃，春來無處不茸茸。
六朝舊恨斜陽裏，南浦新愁細雨中。
近水欲迷歌扇綠，隔花偏襯舞裙紅。
平川十里人歸晚，無數牛羊一笛風。

答李仲弘寫懷次韻

休對清江嘆逝波，且拋簪珥著漁蓑。
愁邊卮酒懽娛少，老後文章感慨多。
燕子綠蕪三月雨，杏花春水一羣鵝。

聊將白髮歸來意總和東風懊恨歌

又

春來渡口足風波獨立船頭舞短蓑高柳忽驚啼鳥變
故園應是落花多尋人不敢門題鳳愛客都將字換鵝
獨有屋西山數疊也應憐我醉時歌

自笑用前韻

自笑多愁鬢有華懶求真訣飯胡麻庭蕪綠是今年草
籬槿紅非昨日花西月墮江沈半壁北山當屋露雙鬢

此身那得如鷗鷺雨泊風飄片片斜

浦口逢春憶禁苑舊遊

春水消盡草生齊細雨香融紫陌泥花裏小樓雙燕入
柳邊深巷一鶯啼坐臨南浦彈流水步逐東風唱大堤
還憶當年看花伴錦衣驄馬玉門西

晚泊湓浦逢冷節

小雨籠陰護晚霞柳邊停棹聽啼鴉湖光已綠皆春草
風信偏寒是杏花到處青鞵隨蛺蝶誰家紅袖泣琵琶

匆匆客裏逢佳節那得行人鬢少華

舟中聞鄰船吳歌有懷幼文來儀

輕帆短檣汴煙波疊渚回舟奈遠何一路詩從愁裏得
二分春向客中過江通漢水晴偏綠山入湘雲晚更多
何處思君腸欲斷楚妃祠下聽吳歌

興安道中

青山一半入層雲碧磧千林轉夕曛松碣看來多漢刻
竹祠隨處是湘君路經搖洞諸峰直泉入灘江兩派分

莫據孤鞍聽蜀魄野棠疎雨又紛紛

二月晦日來陽江口寄書

自笑無家類轉蓬年光何事更怱怱
數聲鶯囀千巖裏一樹花開萬竹中
夜入瀟湘偏恨雨春來杜若自宜風
兒童別久應驚問華髮飄蕭似老翁

神陽道中見海棠

桂陽江口望祁陽疊疊煙雲入渺茫
高樹綠陰千嶂濕野棠疎雨一籬香
縱無春在堪回首況有鶻啼合斷腸

惆悵東湖堤畔柳暖風輕絮正悠揚

客中寒食有感

客舍蕭條百尺天衡陽城下柳陰船梨花濕處初晴雨
草色含來乍禁烟馬足踏青悲昔夢羅衣傳燭待明年
三吳八桂東西路萬里空山哭杜鵑

桂林即興

江為池塹石為城南去蒼梧幾日程碧殿尚存虞帝像
青山不廢伏波名蘭根出土長斜掛榕樹成門却倒生

時有苗人與蠻女負薪輸布事科征

晚發瓜洲

江花江草望中稀
相趁畸人萬里歸
鷗泊晚潮爭北上
鴈隨春雨向南飛
船頭野老新巾幘
馬上王孫小帶圍
嗟我遠來頭總白
洛陽塵土滿征衣

春日山西寄王允原知司

畫船搖櫂蕩晴波
步障圍風踏軟莎
簫鼓隊衝黃鳥散
綺羅人比白鷗多
不知酒與愁成敵
長恨花為病作魔

回首六橋青草徧水光山色近如何

紅綠蕉二女圖

兩樹紅蕉隔禁扉
曉涼攜伴試羅衣
金鈴小犬迎人吠
應怪秋來出院稀

又

為折芙蓉向御溝
碧羅衣薄又驚秋
侍兒剛道新涼好
不解芭蕉與扇愁

故山春日

千花萬萼委塵埃只有荼蘼一樹開應是鄰家更零落
過牆蝴蝶又飛來

又

梨花兩枝春可憐下馬折花山徑邊山中人家改新火
隔樹吹來榆柳煙

又

青青蘆笋雜蒲芽細細浮萍是柳花昨日臨池看蝌斗
曉來風雨已聞蛙

又

寂寂青山一鳥啼
紫藤花落午風微
不知刻漏長多少
但覺桐陰半日移

又

輕寒拂拂雨沈沈
紅漸蕭疎綠未陰
不是窗前兩啼鳥
錯將時序比秋深

雨中看花

春風幾日雨淹淹
鶯慘花愁總不堪
惆悵隋堤千樹柳

至今垂恨望江南

春暮西園雜興

疎疎簾影漾微波
庭戶無人鳥自過
一樹楊花三日雨
池塘春水綠萍多

落花嘆

半隨流水半莓苔
只有沾泥更可哀
燕子也能知愛惜
為人銜入繡簾來

粉團兒花

小小流蘇結素羅團團香粉綴柔柯玉奴不識傷心恨
滿面春風笑靨多

避暑貽美人

酥凝酪粉煉霞觴衣染浮絲碧藕香試下瑤階看明月
玉膚消得幾多涼

赤山漫興

松梢吹粉落衣裳躑躅花開竹筍長可是山中朝洗藥
一渠春水茯苓香

松陵道中

吳姬盪槳出蘋花
江上行人未到家
日晚城邊秋似水
萋萋烟樹亂鳴鴉

青山白雲圖

手種溪頭十畝陰
鳥啼花落暮雲深
夜來一尺蘭苔雨
若個扁舟肯見尋

九月八日對菊

去年風雨罷登高
今日黃花預見招
莫怪籬邊開未滿

正含秋色待明朝

大姑山下梅花


紫萼黃鬚抱玉膚也應人惜半枝枯雪中惟有山僧折
瓦缶寒泉薦大姑

德安山中

石橋斜日萬山陰雲滿寒溪雪滿林獨有梅花看不厭
江南春色故園心

舟回看廬山

雪中西去雨中還又見秋雲黯淡間不是漂零應不得
一年三度看廬山



石倉歷代詩選卷二百九十四